

U Kiseljaku održano javno predavanje o ravnopravnosti spolova u uknjižbi bračne stečevine i stjecanju prava vlasništva nasljeđem

21.05.2018 10:08



U okviru implementacije Projekta registracije nekretnina u Federaciji BiH, a uz direktnu podršku švedskog donatorskog projekta CILAP („Jačanje izgradnje kapaciteta i procedura u zemljjišnoj administraciji BiH“) u Kiseljaku je 17. maja 2018. godine održano javno predavanje na temu „Ravnopravnost spolova u uknjižbi bračne stečevine i sticanja prava vlasništva nasljeđem“.

Predavanje je održano u prirodnom ambijentu na području Općine Kiseljak (zakupljenom prostoru) uz

saradnju uposlenika katastra i srednjoškolskog centra „Ivan Goran Kovačić“ u Kiseljaku. Prisutnima se najprije obratila gđa. Anda Zimić predstavivši aktivnosti CILAP projekta, te gđa. Jasminka Suša, voditeljica grupe “Integracija ravnopravnosti spolova u zemljišnoj administraciji”.

Održana su predavanja sa osvrtom na:

- Međunarodno i domaće zakondavstvo, naročito na Zakon o ravnopravnosti spolova;
- Predstavljen je položaj žena kroz povijest u oblasti prava na imovinu;
- Ukazano je na razloge važnosti rodne ravnopravnost i njihovu povezanost;
- Predstavljen je sadašnji institucionalni okvir zemljišne administaracije u FBiH.

Predstavljen je i Zakon o porodičnim odnosima FBiH sa osvrtom na bračnu stečevinu i Zakon o nasljedivanju. Pojašnjen je i postupak upisa u zemljišne knjige i značaj povjerenja u iste. Gosp. Šeho Zimić je predstavio i film sa primjerima žena koje su imale određene poteškoće u rješavanju imovinsko-pravnih odnosa.

Osnovni cilj predavanja je bio upoznati prisutne sa njihovim pravima na nepokretnoj imovini koja imaju kao supruge, majke, sestre i u postupku nasljedivanja. Posebno je istaknuta potreba za upisom prava i ukazano na činjenicu da je pravo na imovinu isključivo formalno-pravnog karaktera i da bez pisanih dokaza koji je proveden u zemljišnoj knjizi to pravo ne postoji. Naglasak je stavljen i na ekonomsko osnaživanje žene kroz stjecanje prava na imovinu.

Javna predavanja o ravnopravnosti spolova su dio Plana aktivnosti za 2018. godinu CILAP projekta u cilju povećanja broja upisanih žena sa pravima na nepokretnoj imovini, a na način da se upoznaju sa pravima po važećim zakonima, razvijanjem svijesti i razbijanjem predrasuda koje su tradicionalno prisutne na ovim prostorima.